

الكتابالأول

وللر اللين محمود

الألفة

بدرالدين محمود

مقرر لجنة الكتاب الأول ، خيرى شلبى مدير التحرير ، مدير التحرير ، منتصر القفاش المشرف الفنى ، هشام نوار

المهتاب الأواء

- 119 -

# الألفة!

شعسر

تأليف: بدرالدين محمود



# المجلس الأعلى للثقافة

#### بطاقة الفهرسة إعداد الهيئة العامة لدار الكتب والوثائق القومية إدارة الشئون الفنية

محمود ، بدر الدين

الألفة !!: أشعار بالعامية المصرية/ تأليف : بدر الدين محمود

ط١؛ القاهرة ، المجلس الأعلى للثقافة ، ٢٠١٠

۱۷٦ ص، ۲۰ سم

(أ) العنوان

١- الشعر العربي - مصر - تاريخ - العصر الحديث

A11,47Y

رقم الإيداع ٢٠١٠/١٠٥٤ الترقيم الدولى 0-999-704-977 -977 -1.S.B.N.978 طبع بالهيئة العامة لشئون المطابع الأمبرية

# حقوق النشر محفوظة للمجلس الأعلى للثقافة

شارع الجبلاية بالأوبرا – الجزيرة – القاهرة ت ٢٧٣٥٢٦٥ فاكس ٨٠٨٤٥ El Gabalaya Sı., Opera House, El Gezira, Cairo.

Tel.: 27352396 Fax: 27358084

إلى أبى ..

إلى أمى ..

إلى إخوتى ، وأخواتى ...

إلى من حكمت عليها الحياة لتكون شريكة حياتى ..

إلى ابنى أحمد ..

ودعاء وأميرة وناهد .. بناتى ..

أهدى بعضاً مما حرّت حقيبة ذكرياتي ،

بدرالدین محمود ۲۰۰۹/۱۲/۱۲

# أولاً ثلاثيات

# (الأولى)

#### ١- كرانيش الخوف

وحكمت على بدون أوراق... أسهر وأشتاق..

كنتِ القاضى.. كان شكلك يومها مهوش عادى..

على صدرك كان الخوف كرانيش.. وصرخت يا عالم نفسى أعيش..

على صوتك، غطى على كلامى وعساكرك قالت: قدامى!! "قدامكم ليه، وعملت أنا أيه، لا أنا مجرم، ولا كنت حرامى.."

ولد ابن حلال من وسطيهم قال: "اسكت.. حاول ترضيهم..

باللیل راح أجبلك وأمشیك، و إیاك تیجی مرة عنیا علیك.."

> و هربت في قلب الليل.. مجروح.. لو اسيبك انت. يا ست الكل لمين راح أروح؟!

#### ٢- النيل.. وزيت القنديل.

ومشيت بعيد عنك، يا أم العيون سودا.. وركبت هوجة و لادك، وكتبت ع الموضة..

اتبسطوا الناس، صقفوا بحماس.. قالوا: "واد فنان، مليان إحساس.. إتمايلوا ورقصوا، وقلت خلاص، أهلا بالدندى، وبالأناناس!!

وهجرت بيوتكم يا غلابة..
سيدنا الأستاذ مبقاش "بابا"..
ركب إسمها إيه،
ولبس سوارية،
وابتسم البسمة الكدابة..

شهرين ثلاثة ولقتنى، تاية بدون علامات.. لا أنا طلت حب الغلابة، ولا رضا البهوات..

> حبیت علی رکبتی.. قربت من ناسی.. ومن ترابك یا أمی.. عطرت أنفاسی..

> فطت دموع الفرح،
> لما رأيت.. نيك..
> أنا مين؟ أنا رملتك.. أنا زيت أقناديلك
> من لوعتى، ف غربتى،
> أنا جيت أناديلك..

أنا مين بعيد عنك، إسمى يكون طب إيه... أنا كل ما همك، من الألف.. لليا!!

#### ٣ـ ست الككل.

وكان نفسى على أرضك... أخطط كلمتين باقيين... وأزرع فى صحاريك. عيدان الفل والياسمين..

وكان نفسى، تمدى أيديك ونسلم، وأقول أنا مين.. وأبوسك بوسة فوق خدك، يميل قدك، يميل قدك، أمل وحنين..

یاست الکل... یا بلدی.

# (الثانية)

#### ١- السجن والكلاب.

فتح الجورنان..

قفل الجورنان..

أكتر من ميت قصة لإنسان.. مبقاش إنسان أصبح تكوينه،

كما الحيوان..

إن جاع.. بيعض، وينام ع الأرض ومطالب بعد دا كله يقدم صحبة ورد!!

للسجان اللى استطعم طعم الجلد للجلاد اللى سياطه ما رحمت حد لكلاب السجن اللى أتربت على نهش العرض!!

أكتر من ميت قصة لإنسان مبقاش إنسان.. والفاعل بره الحلقة.. جبان..

معروف، معروف..

بس المألوف،

الكترة تشاور على الغلبان..

يتلموا صفوف، وعينك ما تشوف.. وخسارة خسارة على الجدعان..

فتح الجورنان.. على برج الحظ وأخبار الغزلان.. على ست فلانة، وحكايتها مع سيدنا فلان..

قفل الجورنان.. خايف من سور السجن، ومن كف السجان.. خايف من كلمة حق تضييع وسط البهتان..

خايف من صهد حروف السطر يركب نفس القطر.. يصبح تكوينه كما الحيوان: إن جاع بيعض، ويتام على الأرض.. ويتام على الأرض.. ومطالب بعد دا كله يقدم صحبة ورد!!

# ٢ التلميذ والأستاذ

ضرب الجرس..

نزل التلامذة صف واحد.. للعلم..

تلميذ فقير .. معهوش ورق.. معهوش قلم..

أستاذ ف قلبه حجارة

من دبش الهرم،

دو غرى اترسم،

ضرب أخونا كام قلم..

الواد فقير، لكن جدع..

م الخوف.. فزع.

نزلت دموعه، تملا كاس..

حواليه أنا وإنت شخوص..

مفيناش حماس..

مدينا كف.. اننين.. تلاتة..

ببلاهة..

وبغاية البساطة..

وسكتنا لما شفنا دم.. "مالنا يا عم..

أنا قولتلك أخرتها غم"...

الواد فرد درعاته، وصلت للقمر.. وصل مراده للقدر.. بكى السحاب.. نزل المطر.. غطانى أنا وأنت.. وأستاذ الحجر..

روح الولد ضعكت وقالت:
"يا بشر..
أنا كنت عايش زيكم..
وكنت أبعد في النظر..

سكت السحاب.. سكت الولد.. صوت المشايخ قال: مدد..

> ضرب الجرس.. تلمیذ جدید تانی أنجلد واحد .. تلاتة.. أربعة.. وآه یا بلد..

#### ٣- الخوف والعسكري

قالولى إضرب

ف العيال

اللي بتهتف للقديم..

إضرب بدون رحمة.. سوا رجاله كانوا أو حريم

كان لازم أسمع وابتدى..

لما العصايا كات بتضرب،

كنت إنت بتنشدى..

ضربك يا بنتى مكانش أبدا مقصدى..

شلتك على ايديا، صرخ فيا الكبير... جوايا كان الخوف وكان العسكرى، أنا عمرى يوم ما خربت بيت، ولا كنت أبدا مفترى..

> مجنون بقیت، شایل علی أیدیا الكفن.. بدنی اختفی جواك یا أشرف بدن.. لحظتها بس أنا بكیت..

ليا.. وليك..

وللوطن!!!

عارفة يا بنتى، مكان ما كنت بتقعدى، زرعت شجرة موردة.. باسقيها لما الصبح يطلع، بالدموع.. قطرات ندى!!

# (الثالثة)

#### ١ـ الخداع..

إيه يكون لون الخداع؟!

سكة فيها الأبيض إسود..

واللقا بداية وداع..

والصراع..

في البداية كان مجرد.. إختلاف وجهات نظر..

و القدر ...

دق دقة على الوتر .. صحصحت أعمى البصر ..

قبلها كان خطوة واحدة ويبتدى رحلة ضياع..

#### ٧- السكوت..

إيه يكون لون السكوت..

سكة بتشيل الحروف جوه التابوت..

لو تعوز الحرف، تخضع للشروط...

لو تكون عاقل، ومتساهل..

تفوت..

تبقى واحد من عيون الاخطبوط

تبقى زى القطر ليك دورة وخطوط.. فوقها تمشى وتترسم، والغنايم تتقسم.. مش مهم إن عشت وحدك، ولا عشت مع الطشوط..

٣ الخلاص..

إيه يكون لون الخلاص!!!

٧\_ في الصبا والشباب.

# (الرابعة)

#### ١- احتياطي

فات الكتير، وباقيلى... حبه سنين.. فكه باحاول أثبت وجودى... أفتح بيبان.. عكا أكون أساسى و أبعد... عن قعده ال .. دكة

ضحك زمانى وقاللى ... ما انفضت ال.. عركة قضيها ضعف وإبر.. شكة ورا... شكة وكفاية فرك وسفر... فاضل عليك... نكة

# ٢۔ آخر فرصہ

مستعجل قوی یا زمان، علی تجاعیدی و علی شیبتی..

طب لو كنت إنت مكانى... تختار تختفى دلوقتى؟

یا ما قلت إن انت معایا، یا ما قلت هنظر حالتی.. و کنبت فی مدحی قصاید... و أنا صدقتك من طیبتی.

مطلوب دلوقتى أستسلم،

آسف جدًا.. مقدرش..

أنا خدت خلاص الكورة... وبقيت جاهز للماتش وعرفت أصول اللعبة... ودى فرصة متتعوضش!

# ٣ حلم بعد الأربعين،

أربعين، أربعين،

شئ ومكتوب ع الجبين..

إلا لو كنت إنت تقدر ... تختصر حبة سنين ولا ترجع للطفولة،

والكافولة أم شريطين...

و لا إيه رأيك نجدد،

اللى كان بينك وبين ..

البنات أمات ضفاير ... اللي بيك متشعلقين

أوع من فضلك تصدق،

م أنت سيد الحلمانين..

هو ممكن عيش محمص، مستوى، يرجع عجين؟!!

# (الخامسة)

#### ١ـ حرف صاد

لما أموت أبقوا أدفنوني،

جوا بحر من المشاعر..

صدقونى قلبى حاسس .. باللى ف قلوبكم وشاعر ...

طول حياتي تقولوا إني .. غصب عنى هابقي شاعر ..

بس خایف..

م التراب، ياكل خضارى..

م السواد، يسرق نهارى..

بعد عمر تملى يضحك ... يبقى بس الصمت جارى..

مش غريبة..

يشترك صمتى وصراخى،

في حرف" صاد"..

تيجى لحظة موتى تعلن.. شكل تانى للميلاد!!

# ٢ اصل .. وصورة

وبادور على عمرى المسروق...

وبابص بطرف عنيا.. لفوق..

في عروقي بيجري الدم..

بافوق..

وباشوف في غروب الشمس. شروق..

وبادور على سن التصاوير
وأنا وسط عيال الحارة باطير ف الدبابير
ينقطع الحبل وأحس كأنى معاها باطير
الله على شكل الأرض... خطير
وعيال الحارة بتصغر تبقى كما المسامير
وبيوت الحارة عيدان كبريت لا بسين طراطير...

من زير محطوط.. بجوار الحيط.. قمت اتوضيت..

وبادور وبادور تانى وبيضحك لعنيا زمانى... وبيضحك لعنيا زمانى... ويسلم لى بداية الخيط.. ويوصل رجلى لغاية عتبة باب البيت

خبط ورد الباب فرحان..
وفتح انسان يشبه لى كلمنى برقة.. وحنية..
ودخلت معاه،
لألأ.. جواه..
م أنا أصلى النسخة الأصلية!!

#### ٣ يا للا يا قلبي..

يا للا يا قلبى إضحك كركر، وادينى ودنك أقولك سر.. وادينى ودنك أقولك سر.. "ويا الفرح العمر بيجرى.. ويا الحزن محلك سر"

يا للا يا قلبى علينا الدور نمضى ف كشف الحظ حضور فكر بدع.. وإياك ترجع.. تانى ف قلب الساقية تدور

يا للا يا قلبى أنا نفسى أطير، بالأحلام ويا العصافير.. مش معقول تضحك لى الدنيا.. وأفضل أنا للحزن أسير

يا للا يا قلبي وبطل خوف،

فتح عينك.. بحلق.. شوف..

مهما الدنيا تطول بينا... إحنا يا قلبي عليها ضيوف!

#### (السادسة)

#### ١- اللمبي

كل واحد فينا لازم،

مهما كان يصاحب له "لمبي"...

والحياة يصبغها فورا.. مرة أحمر مرة بمبي

والهواية اللي يتابعها،

يا سلام لو رقص شعبى..

والموسيقي جاز "وطبعا... الغنا ميكونش عربي.

بالطريقة دهييه نبقى،

"أورجينال" جدًا يا صاحبي

والحياة هتروق وتحلى ... وكل شئ يصبح أوروبي!

#### ٢- ع الناصية [

نواصى الشارع المصرى،

تفوق حصرى..

عليها تلاقى باستمرار ... شباب عصرى

في إيده سيجارة ... بيخمس ..

لفعل الشر... متحمس...

وف الأعراض..

طبق معتاد..

يدب اللقمة.. ويغمس!!

يخلص وقفته يقعد،

ع القهوة اللي مبتقفلش..

يصقف" شيشة يا حمادة.. وشاى بحليب لعمك "درش" وهات قهوة هنا زيادة... ولو تسمح متتأخرش"

بعيد عنه بكام خطوة..

أبوه بيمد في الخطوة...

ومبيهمدش..

بیعمل أی شئ مسموح، فی أی مكان حلال.. بیروح..

عشان للبيه..

يوفر قرش!!

# ٣ فرح العمدة!!

یا و لاد الحارة، خلاص خلاویص..
العمدة أمر، نفرح ونهیص..
غیر خلجاتك یا حمیدة،،
حمری فی خدودك یا وجیدة
والبس شفتشی من صنع باریس!!

مالكم يا اخوانا، باقول أفراح زغاريت حواديت، برقوق تفاح يوم بعد الحزن نعيشه هنا، علقوا تعاليقكو هناك وهنا، وهاتوا لنا بنص جنيه أرواح!

بتقولى مفيش، للفرح مكان.. ف الغدا ف العشا، هم وأحزان.. بقى بعد العمدة م حن عليك، تتلكك وتشبك ف إيديك.. مجنون تلاقيك، لا أكيد عيان..

يا حميدة بلاش تركب راسك و لا أنت نسيت كان إيه أساسك. إضحك وخلاص من ورا قلبك وقصاد العمدة أحفظ أدبك ويا سعدك لو ميل باسك!!

أنا زيك مظلوم، وباقاسى وديون الخلق كلت راسى وعيالى إن فطروا ميتغدوش، وفلوس الشهر مبيقضوش.. والفقر محدد أنفاسى!!

أضحك يا حميدة.. وعديها أهى مركب أنا وأنت عليها والعمدة أهو ريس وحاسبها، ومعانا كمان برضه راكبها... معقول على بوزها.. هيكفيها!?؟

# (السابعة)

## ١. آخر سندريللا

لما كنا زمان بندرس،

حرف جر، وحرف علة..

لما كانت ليك صحبة.. ولما كانت لي شلة

لما كنا زمان بنسكن،

جوا حلم في قلب فيللا..

كنت فاكر نفسى "روميو"... وكنت آخر سندريللا

كبرت الأيام ولسه،

إحنا في قلبيها.. نونو...

سندريللا زاد جمالها... وروميو كان اللله ف عونو ضاع شبابه ف الوظيفة.. وفي المرتب خاب ظنونو!

## ٢ـعريس لقطة [[

وأنا مملكش يا عمرى تمن حتى رغيف العيش بيصبح حبنا نزوة اختر عناها فى لحظة طيش بيصبح حبى حرية،

وباقلع دبلتك لى.. عشان بى.. متر تبطيش..

وباحلفك..

منیش زعلان..

وباتمنى اللى بعديا.. يكون دفيان وبعد سنين من الغربة، يذلل أزمة الإسكان..

ميفرقش ساعتها السن، و لا قلب العذارى، يحن.. كفاية الناس حواليك.. تبطل زن عريس لقطة، ومتريش، ف ليلة الدخلة، بيشيش... ويحبسها بكنكة بن

ليليتها هتبقى مبسوطة، ف وسط اللمة والزيطة... وأنا ع البعد قلبي يئن!!

## ١ـ الفقير.. والحب!!

فقير بيحب؟!! يحط الرجل فوق الرجل، ويلبس اللى فوق الحبل، ويلبس اللى فوق الحبل، ويمشى وقبل منه الطبل...

يقف يستنى محبوبته.. ويستنظر... يهندم نفسه ويحاول... يبان أصغر... ويتآلط ع المكتوب... ويتمنظر...

فقير بيحب؟!!

ينام يحلم بمحبوبته.. بتندهله.. يسيب بيته، ويلعن، سلسافيل أهله.. ويتعشم، ف سيدنا الحب، لما يطب، يشفع له.

منین هیغذی إحساسه.. و هو جعان؟! منین هیطوع الأوزان؟! منین قلبه اللی عاش محروم... هیدی حنان؟! فقير، مكتوب عليك تنحط جنب الحيط.. وتنسى اللى أنت بيه آمنت .. أو حسيت.. كفايه عليك، تعيش مستور، وتستنى العدل.. في البيت!!

# (الثامنة)

## ١- الطريوش!!

أكبرها ورقة في جيبي من فية "جنية" ما هو لو هتكبر عن كده هاحتاجها ليه؟! أحلامي وعارفها، وأمالي وشايفها.. ولا عمرى رحت البحر.. ولا نمت في شاليه.

هتقول موظف؟! أما قولك دا عجيب، هو الموظف في الزمان ده جراله إيه؟ فينك يا شيخ "سيد" تغنى لهم، وتحكى، أيام م كنت ف وسطهم أستاذ وبيه طربوشي فوق راسي، مكمل هيئتي... أفندي راسم نفسي ف البدلة اللاميه. دلوقتي أصبحنا ف زمن غير الزمن دلوقتي أصبحنا ف زمن غير الزمن

والجاني بعد م "قب"

بقی مجنی علیه.. عبی وخبی کتیر، وبرضه لسه أنا أكبرها ورقة فی جيبی من فية "جنية"

# ٢ـ موظف حكومتاا

أنا بعد إذنك،

موظف حكومة..

واخدها وراثة.. بجد وحماسة

وأقصى آمالي رغيف حاف ونومة!!

ولو زدت حبة،

وكان فيه محبة..

بيفرجها ربى .. بدعوة وعزومة!!

أنا في البداية مكنتش بافكر بنفس الطريقة وكانت آمالي،

ف خاطرى تلالى .. كأوفى صديقة

وكانوا يشاوروا على

ويستنوا إمضة أيديا..

وكانت علاقتى، بحظى وبختى، قوية وثيقة!

نهایته،

وصلنا لآخر الطريق..

بقیت أنت وحدك، یا مللی، صدیق.. وطفی العباقرة ف عقلی، نبوغه صبح صعب جدًا، على بلوغه

بقيت في الوظيفة، كقطة أليفة.. وف الصف واقف، ببدلة نضيفة عشان النهاردة يا صاحبي افتتاح متزعلش مني، م أنا مهما أغنى في نظر الأكابر.. مجرد نواح!!

# ٣ـ حارة الدراويش

أنا بس اللي بتألم..

ومطلوب منى أتكلم .. بدون داعى.. عن اللى مالوش ف أسماعى، صدى أو صوت

و أطق أموت، مفيش مانع

مدام فلعوس ومش قانع..

أنا طب مين؟!

موظف فوق ملف حزين..

أروح طب فين؟

من اللي قريبه بيه وكبير..

من اللي الواسطة عنده مدير..

أروح طب فين ف وسط وحوش.. أنا لو صوتى يوم يطلع، ميسمعهوش..

يقولوا البيه صبتح.. مرووش

ويضطر الصدى عندى،

يقول: حاضر.. مصير الظلم له آخر..

واحس .. واعيش..

أودع حارة الدراويش

وأسكن فوق ف سابع دور

ويصدق مرة برج التور

أجيب لأو لادى من نفسى

ولو "أرواح"

أفطرهم في يوم "بسطرمة" أو "تفاح"...

أحس... وأعيش...

أودع م الكلام.. تناتيش..

تقول: معلش.. متأسف.. مفيش داعى..

ولا أتكلم بدون داعى

عن اللى مالوش ف أسماعى صدى أو صوت ولا أصبح ف الكلام محطوط.. ما بين قوسين

و لا أسأل فين،

مكانى بين وحوش قاسيين

لإنى خلاص،

أنا راخر .. بقالى نابين!!

## (التاسعة)

## ١- رسالة إلى ما تبقى ١

لما لميت السنين..

لما حزتت العيال المبسوطين..

لما قلت: أنا حلمي بس جميل.. وزين..

آخرتها،

شايفها إيه؟!

السنين من بين إيديك اتبعترت والعيال في كل سكة.. أتنتورت واللي قلت عليه جميل، أصبح غتت..

شوف فاضلك إيه بقى تبكى عليه؟

نفسى تصحى، قبل ما يطول المنام.. مش ف إيديك ساعة،

شوف الساعة كام..

مش هتكفى البصلة تاكل، لما هتبطل صيام!!

#### ٢ـ ڪوم برايز

ياللا سافر..

لم خلجاتك.. وهاجر

بوس و لادك،

ودع الفقر .. وعنادك ..

أرض ربك عمر ما كان ليها آخر..

ياللا سافر..

خللى قلبك كالحديد..

ف البلاد التانية يا بني،

تتولد انسان جدید..

كل يوم هتشوفه... عيد

حد يكره، بعد حزن الدنيا ديه،

يعيش سعيد؟!

ياللا سافر

حل بريمة شقاك..

نطة واحدة وتنطلق بره الشباك..

شوف بقه الدنيا هناك.. يا هناك..

يا سعادة ست خضرة وهى بتلملم وراك للمحمر والمشمر، تتبع دايما خطاك

ياللا سافر..
الفلوس فى الغربة أكتر..
حر، جايز.. ذل، جايز..
ايه يضرك، لو بذلك،
تمتلك فوق م انت عايز.
تغترف من كوم برايز..

شيل يا شيخ إياك تفكر.. دى العيال عماله تكبر والهموم حواليك بتكتر.. وإنت يا ولداه موظف،،، مقصر!!

## ٣ رحلة تعارف

مسافر عشانك..

عشان نفسی أعرف زمانی، بزمانك.. هتحكی .. هتشكی.. ویمكن هتبكی وبعد إنصر افی.. یعود انزانك..

مسافر لإنى تعبتك معايا..
وفقرى ملازمنى. ورايا.. ورايا..
بدونى هتنسى، وع الشط ترسى..
وتانى هتقفى قصاد المرايا..

وتانى هيرجع لعمرك.. شبابك وتنسى اللى م الفقر، نابنى... ونابك.. وتملا معانى السعادة عنيك وتملا الهدوم الجميلة... دو لابك!

2 في العمر والسنوات!!

#### (العاشرة)

#### ١. كشكول الحواديت! ١

السنة اللي بتسقط مني،

بتجنني.،

بتحدد للأيام سنى..

الشعرة السودا اللي بتبيض،

بتوجعني..

أنا مين يعني؟!

أنا كنت وكنت وكنت زمان.. دلوقتى ملكت بيوت ياما من غير سكان.

دلوقتی بقیت،

كشكول حواديت، مربوط في لسان!!

شجرة جوز هند،

بتطرح عند،

فصوص رمان.

دلوقتی با ست الحسن، خلاص، انکسر الکأس.. ولقینتی باعیش أیامی بصدق ف وسط الناس..

فى عيون الطفل اللى بتضحك من غير داعى أضحك،

> وأنا واعى ومش واعى... الضحكة تخفف أوجاعى..

داوقتى خلاص العمر كبر، وعرفت الحب نصيب وقدر..

> وندمت كتير إنى اتمنيت، أهرب م البيت..

كان قلبى ساعتها حقيقى حجر!!

#### ٢ البنت والشايب

باخاف منك على نفسى،

وأخاف ترسى،،

على شط الهوى الدايب..

حلمت كتير،

وفرق كبير،،

ما بين البنت... والشايب...

باخاف، والخوف بيقتل كل أحاسيسى... وبيقطع بسوء الظن.. قصاقيصى..

وسامحيني..

إذا يوم الكلام خانني..

خرج عن طوعى .. ونظمنى .. بيوت من شعر طوافة .. بانسمة رقيقة .. شفافة ..

> يا أسطورة جمال فضى.. أنا مهما الهوى خدنى، ما عمرى أزيد على حدى

أنا ليك. حدث عرضى كلام لا يجيب و لا يودى مجرد تجربة صحت، حاجات نامت خلاص عندى..

باسيبك، بانهى احساسى، وأنا مرضى.. باسيبك تبتدى وحدك، وبارجع للحياة... وحدى..

#### ٣- الضاحك الباكي..

بافكر كل يوم فيك، وبالاقيك، في كل طريق، مسبقانى.. بنظر اتك.. محوطانى بيصبح سهل إنى أحب، وأعشق، وأعشق،

بافكر كل يوم فيك، وباديك، كتير من حر أملاكى.. وباشتاقلك، وباستنى تمرى تحت شباكى.. وبعد العمر دا كله، بادوب فيك.. وباهواك..

وفين هيبة بياض شعرى؟ وفين سورى وأسلاكى؟ وفين غابت عيون عقلى، لحد م قلبى خلاك تكونى كل شئ لى.. وأكون الضاحك الباكى...

بافكر كل يوم، لكن خسارة، وصلت متأخر ما بين سنك وبين سنى، بتجرى الخيل... وتتمخطر...

بيصبح بس من حقى،، أبص بعينى... و أتحسر ..!!

# (الحادية عشر)

#### ١ـ كان .. يا ما كان ١١

حب الكراس.. والضحكة أساس، والبنت رقيقة صغيورة..
كلها إحساس.. لا دهب ولا ماس، ولا كانت أبدًا مغرورة..
عاشت للناس.. حب وإخلاص، من غيرها إزاى تبقى الصورة؟!

حب الكراس، أبيض فضى..
حب الكراس، أزرق عندى..
سبق الأحداث،
وخطاوى الناس...
واتصومع فى البرج الوردى..

هدم الكراس الحدوته.. معرفش الفرق بين التفاح.. وبين القوطة..

أصبح

بنوته صىغنتوته..

تتشعبط في دراع الأراجوز...

وتدوب

ف طعامة البسكونة!!

# ٢ الأراجوز .. والسنيورة

سينا الأراجوز، واد متربى من أول نظرة، دخل قلبى في الشكل عجوز، لكن كلبوظ..

شيك جدا في البدلة البمبي..

سيدنا الأراجوز، والدنيا حظوظ

خطف السنيورة اللي بتحبى ...

أصدر فرمان،

والهوى سلطان..

الفكر العالى...

صبح شعبی...

سیدنا الأراجوز، فكر و إنجاز حبس السنیورة فی حلم إزاز وقصاد الناس... بقی و اد عصبی...

نسى أصله في ساعة طيش وغضب نسى إنه في بدأ الأمر خشب

إنتكر للى كتير خلاه، يتملى احساس، يشتد حياة... يشتد الله يقول: الله...

مبقاش يتكلم بالعربي!!

٣- إحلال.. وتجديدا

وصعب عليك... تعيش إحساس مهوش ملكك وتعشق بنت مش قدك

هتتجاوز كتير حدك.. أنا وياك..

معاها الحب زى الشهد والسكر.. بتحلو الحياة.. أكتر.. يكون شكل الحياة طب إيه، إذا كان الحبيب أصغر؟!

أنا وياك..

سنين العمر محتاجة تجددها...
ببنت صغيرة ترضاك لها سيدها
تقول الكلمة لا تتاقش. ولا تعيدها..
ترن الشخطة، تتسمر في مقعدها..
وآخر الليل، يا طول الليل..
تسند فيك.. وتسندها!!

أنا وياك، ومش وياك.. خلاص عد الزمان.. وإداك.. هنتطاول؟.. هينظر ف اللي شايله معاك.. هنتمنظر؟.. هيفتكرك ببركاته... وما أدراك..

وبص وراك، تلاقى ضناك، صبح طولك.. ولى العهد ومقصر سواد ليلك بعيش إزاى، إذا صممت... من غيرك!!

وصعب عليك، وعلى، وانا عارف.. وأنا عارف.. بتطلب رأيى بعد اللى حصل.. أسف.. قصاد الحب، أنا مغلوب على أمرى.. وأقولك إيه؛ يجوز قدرك.. سبق قدرى!!

# (الثانية عشرة)

## ١- عصفور من الورق.

ياريت العمر فيه باقى.. يا ريت لسه السطور، فاضيه فى أوراقى.. يا ريت لسه الكلام.. لمامَ.. لأشواقى..

يا ريت أرجع كما العصفور، ألف وأدور.. ألف حبة م الحبة، وأرجع م العبة، وأرجع م الغيطان مسرور

یا ریت العمر أستاذی، یصحینی .. ویصحی لی.. یشوف بعد اللی كنت أنا فیه.. بیجر الی..

زرعت الحب في قلوبهم، وقولت الحب. أبقى لي. حصد غيرى ثمار زرعى، ورفرف ف الفضا بدالي.

يا ريت الحرف في كلامي.. بيتزوق... دأنا لو قلت كلمة حق، يقولوا إلحق، بيتريق!! بسيط، وبساطتي في نظرهم، وبساطتي في نظرهم، دي بتغرق!!

یا استاذی،

یا عکازی، فی دنیا الصعب،
وملاذی..
بیحصل مهما راح یحصل،
صداقتك هی إنجازی..
لبر أمان أنا أوصل...
دی مشكلتك،
وإعجازی!!

#### ٢ـ الحق.. والمستحق

قانونا أنا .. حق لى؟!.. ماليش.. وقولت لنفسى، يا واد لمّ نفسى، وما تفتريش.. عيالك بتلبس وتصرف وتاكل.. وأخوك الكبير حل ليك المشاكل.. حقيقى أنت أرعن... ومبتختشيش!!

وبصيت لظرفى .. مقدرش ظرفى .. مقدرش ظرفى .. مقدرش أدبى، ولطفى، وظرفى .. مقدرش إنى، بنام غصب عنى، ولو لا الملامة، لأشهرت ضعفى ..

و أرجع أقولك.. قانونا ما ليش.. وحقى أخدته، والكر مفيش..

متزعلش منی، وتغضب لإنی ساعات غصب عنی، بفکرك.. باعیش!!

## ٣ تتعشى إيه

تتعشى إيه؟ أتعشى صداقة عمر جميل.. وأحلى بفكر عظيم ونبيل..

تتعشى إيه؟

اتعشى آلام وأمال الناس وأحلى سطور حب وإخلاص

تتعشى إيه؟ أتعشى الوهم اللي بيملالي الكون أحلام وأحلى الحب اللي بدال منه الوقتي كلام

تتعشى إيه؟!

كترت يا صاحبى المشاكل، وزاد على الحمل خايف تغير كلامك، ومن صداقتى تمل أنا كان منايا أتنصف، واقب فوق الضل.. واقب فوق الضل.. شاءت ظروفى أتحدف، ف قضايا ملهاش حل!!

# (الثالثة عشر)

#### ١\_ أمانت

بحلق وقاللي،

الحاج خيرى...

شكلك مناكف... وكمان فقايرى

م اللحظة ديه... كلمتوا غيرى

أمسكتو بدلة،

آخر شياكة...

قلدتوا مشية... هذا وذاك

ألبى مهما... تبعد نداك

یا حاج خیری،

أسف ودمتم...

لا فرحى فرحك... ولا عيدى عيدكم طبعى وعمره... ما يضيع عشانكم

أنا كل قصدى،

ومنايا.. أحمد...

خيوط حياتي ... مجوز ومفرد

أمانة عنده... ولا عمره بدد

فهمت ولا،

لسه هاتنکر...

اسأل تقولى ... بردون هافكر

يا فطير بعجوة... معجون بسكر!!

### ٢ـ الأصل مصرى..

ف زمان بيبدأ بالضعيف القزقزة

ف زمان بيرفض أى صوت برا الحذا

ف زمان ملان أحزان،

وكبر.. وعنطزة..

باحلم أحقق بيك، وبي المعجزة

باشوفنى أنا وأنت مع هالة وسميح ورءوف وعم كشيك أبو التعبير فصيح والأصل مصرى وصوتك، يا تجارة.. صريح.. وكنت أنا وسط منكم. في بدون نرفزة

أرجع أشوفنى لوحدى، حيران ف دنيا الثقافة مرتباتها يا عينى، أخر ألاجة... ولطافة مهما أحبق وأدبق.

جيبي في غاية النضافة..

واللي حصل لي صبح، للكل عبرة وعظة

أرجع أشوفنى ما بينكم، تايه فى سكة سفر لا فضلت ع الأرض عايش، و لا طلت أعيش ع القمر خايف ف يوم أختفى، ميبانش منى أثر..

وساعتها هتيجي في.. تتقبل العزا

هتقولوا ساعتها عنى.. طيب.. و هتزعلوا وياريت كان لسه عايش.. وياريتا نحصلوا طب ليه وأنا نسه بينكم،

على بتتقلوا.. وبدال م آخد مكافأة، تدوني يومين جزا

أنا قلت اللى ف نفسى، أبيات شعر وزجل ومهما انتاسوا أمرى، مش هاضرب ع العمل ولو هيأس كلامكم، هيجدد لى الأمل..

وكفاية النظرة منكم.. أكل وشرب.. وغذا!!

# ۲ بسمت أمل

لسه صوتك يا تجارة، بسمة الأمل اللي بينا.. للأصول شنة ورنة لسه حرافيشك بتعمل.. للأصول شنة ورنة لسه أحمد زعفراني، .. للأمل حارس وبنا

لسه أحمد زعفرانى، رغم أعباؤه.. بسيط.. مش معقد، مش أنانى... بالإيمان قص الشريط إمتداد مشروع لوالد.. إبتدا بمكنة فى بيت

لسه أحمد زعفراني،

له ف قلب الناس مكان..

هو هو مهما قالوا.. خ المصالح دیدبان مهما یعلی الموج بیرسم.. شکل تانی للمیدان جنب منه تلاقی "مجدی".

و ايحي" و "جيفار ا" و "يوناز"...

جنب منه تلاقی "خاك"... معدنه فی الشدة بان جنب منه تلاقی إحنا.. بروحنا نتحدی الزمان لسه أحمد زعفرانی،

فوق خدود الليل قمر ...

مهما بيصادف بيصبر .. صبر فوق طاقة البشر إيدنا مع إيده و هنوصل .. منما هيطول السفر

٦\_ في الود والوداد..

## (الرابعة عشرة)

#### ١ ـ الألفة!!

سلام يا صاحبة العصمة..

يا مبتسمة..

با هفافة كما النسمة..

يا شفافة كما العصفورة في الرسمة..

إذا كان الهوى اختارنا،

فدا المكتوب.. ودى القسمة..

سلام يا صاحبة العصمة

بدون واسطة .. بدون محاسيب

يزعلني وأنا جنبك، أحس كأني شخص غريب..

وتتجاهليني وأتجاهلك،

بدون داعی .. بدون ترتیب ..

أمد ايديا، ألاقيني،

مليش في سلام إيديك نصيب..

أقربلك تصديني.. وأحلف أبتعد وأغيب

مكملش يدوب ساعة،

عشان شايف خصامك.. عيب!

سلام يا صاحبة العصمة، ومش قادر أقول... بيباى.. لناس غيرك، أنا موافق، لكن ليك.. أقولها إزاى..

أقولها وبعد منها الوحدة تقتلنى !؟ ونار الشك تكفيني وتعدلني !؟

منیش قایل ولو قلتیها مش رادد ولو ردیت منیش باعد

وهانخفی..

ف حوض وردك إذا كفی..
ومش هاسمح تقولیلی:
"أنا أسفه"..

معاك الود والألفة.. ف فصلك بابقى أنا الألفه..

وبعد ما قلبی عاش جنبك، یکون مجنون "إذا استكفی!!

## ٢- خارج الخدمة

وكان نفسى... تحبينى... الكونك وأنت .... تكونينى... أنام داخل شرايينك... كما إنت في شراييني...

وكان نفسى.. أطير فوق السحاب الأبيض.. وأحلم حلم وياك يكون أعرض.. لقنتى كل ما با شوفك عن الحلم الجميل... بابعد..

وكان نفسى، وسامحيينى قلبت جميع موازينى.. وشوفتينى، وشوفتينى، مجرد تحفة تشيليها،

ف قلب دو لابك الصيني ..

وعينتيني ف وظيفة..

تخيلتيها ترضيني..

"كبير مرضى غرور حسنك"،

وع الدرجة... ربطيني..

ولما ف يوم على صوتى ..

من الخدمة ...

فصلتيني!!!

### ٣ـ الصوت... والسكوت!

وباقدر ع الفراق.. والصد..

وبارفض مهما كان حبك، أكون لك عبد..

بيعلى صوتى،

وسكوتى،

زمان كان حد..

ما بين جنة قبول حبى..

وبين الرفض..

# (الخامسة عشر)

## ١- القطر الأخراني!

ورجعت صغیر من تانی... علی آخر لحظة... حصلت القطر الأخرانی.. وبدأت أدور علی مطرح، وأنا حاسس روحك حارسانی..

القطر بيجرى مبيهديش، وأنا أصلى ماليش، فذ ركوب القطرات دى هواية.. الخوف جه حاطط جار منى، يراجع سنى، طمنى وجودك جوايا..

ومحطة محطة بقيت ملهوف.. السمع والشوف.. أقراك أمل، وجمل، وحروف.. وعينين تضحك.. وجبين مكسوف!!

#### ٢ المارد .. والإبريق

شفایفك لما تتكلم، بتتحكم.. وبتقسم، عطایا الحب ع المخالیق.. وقلبك لما یتكلم، بیتألم.. وبیسلم، بانی ف قلب سجنی..بریء..

وسجانی ضمیر قاسی، وخوف م اللی بنلجاً له ف وقت الضیق.. و أنا لیك، ساعات عاشق، بیتحلی بفكر جرئ... ساعات تانیة، تشوفینی، ساعات تانیة، تشوفینی، و لا حصلت حتی صدیق..

ساعات ثالثة، أنا مارد، ومحبوس جوا ف الأبريق. لإ ما تفتحى لى، لإ ما فلا ما فلا

#### ٣ـ شبيك، لبيك ١١

بایدیا بانزل استارك، باتخلص أنا من أوزارك... ملعون من راحلك أو زارك...

أنا كنت باشيلك في عنيا، وباشوفك رمز الحنية، طب ها عمل إيه وأنا وحديا..

ريدانى أجيلك من قمقم، شبيك لبيك.. أأمر أفندم، ومصيرى أنا إيه.. الله أعلم..

ريدانى بدون كلمة زيادة، حبوب من صنف فوق العادة، تسجيل بيردد ببراعة.. كل الكلمات المعتادة!

لو بتحبینی، متنظریش حتی سؤالی أحسن لی أتخلص من حبك،

و ارجع خالی.. مبقاش مملوك، و أنا لو صعلوك، بابقى الوالى!!

## (السادسة عشرة)

#### ١- السنوات الخمس

ضحكت في يوم وكشرت وجبت مع البنات سيرتي، وجبت مع البنات سيرتي، وهيصت وفرفشت... وقولت إن أنا .. إنت وصدقتك عشان عمرك... ما هولت... و لا كدبت

وعشت كتير، خمس سنوات، باحبك باعشقك بالذات، وحاولوا كثير يوعونى... ساعات باسمع، لكنى ساعات باعيش ليك، وباديك... زهور حبى مع الوجبات

خمس سنوات، وأنا مخدوع، بتسقينى الهوان منقوع.. وباشرب غصب عنى عشان... منيش عاوز أموت من الجوع!!

### ٢ـ حريم السلطان!!

بيفوت عمرك زى سفينة.. شايفة الفرح وشايفة الزينة..

شايفة الشط قلوب بتنادى: تعالى.. ادبنا!؟

تبعد أكتر..

تعشق شط مشاعره، حزینة.. تحمل همه، وتجمع شمله، وتحمع شمله، وتحمع شمله، وتحلم یوم یعشق زیینا..

بيفوت عمرك. وتفكرى ف الصحبة تدوم لك.. ويزيد فى اللى مجاش من بكره... بشاير أملك.. يتهيأ لك...

إن أنا دايمًا هاشعر بيك..

من احساس فياض، هاديك...

وارجع ليك،

ف نفس مكاني . .

قاعد ف الصف الوراني،

حاضن كلماتي وأوزاني..

وأكتب، تانى وتانى وتانى..

یاه یا زمانی،، مش معقول أعشق سجانی.. مش معقول أسكت واستسلم، علشان یوم حرتك و جدانی..

يتهيأ لك..

إن الحكمة بتجرى فى عقلك.. وإن العيشة فى عالم تانى تكون أنسب لك.. م الحواديت يغرف ويجبلك.. من سلاطين الجان.. يخطب لك..

يختفى جواك الانسان..
الوجدان..
ترجعى زى ما كنت زمان،
تحلمى إمتى حبيبك يرضى،
وتصبحى ف حريم السلطان!!

٣ شهادة صدق

وهانساك؟! هترضيني؟!

میسعدنیش أنا رضاك... تكونى جاریتى؟!... آسف منیش سیدك ومو لاك

أنا إنسان بيتمناك إنسانة، حياة بالفكر.. عمر انة.. منيش هاعشق جمال وقو ام.. وأطير على فرسى ف الأحلام.. بيكبر سنى، باتعلم.. وباسبق كام سنة لقدام..

میسعدنیش سلام ایدك، ویوم آجی یكون یوم عیدك، و تلغی كل مواعیدك..

أحب لقانا جواك.. ساعتها أحس برضاك وكلمة حب.. ألقاك..

## وألقاك..

بعمر سنينه عطشانة، وكل دقايقه حيرانه.. يكون شكل اللقا دا إيه؟!

> سيول، طوفان.. شهادة صدق بتأرخ ميلاد انسان!!

## (السابعة عشرة)

#### ١-ليه يا بنفسج!!

مفهمتكيش لما حدفت الوردة ليا.. وجهتك نظرات غبية.. نظرات على.. نظرات على.. نظرات بتستكر وتستكر على.. آخذ مكانى المنتظر بين الرعية..

مفهمتكيش.. واتقلبت بى السنين.. شوفى وصلت لفين أنا، شوفى والمسلت لفين أنا، شوفى إنت فين.. وكأنى كان مكتوب أكون أعمى العنين!!

مفهمتكيش.. دورت وشى ف ناحية تانية.. ومن كسوفك، اختفى وشك فى ثانية..

مدیت ایدیا أخدتها.. ریحت خدی فوق ورقها وغضها..

مالت على.. كأنها بتقول كلمة ف ودنى سابق قولتهلها ف ودنها..

یا وردة یا لون البنفسج، فتحی مکتوب علی غیری یقعد.. مطرحی.. مکتوب علیك، لو سعادتك، تسمحی... تسمحی... و ترضی عنی... و ترضی عنی... و تصفحی!!!

۲۔ سراب

أنا اسف، هجرك مكتوبي.. رغم إن إنت، لما سكنت، جوا عنيا.. محيت ذنوبي.. رغم إن أنا شايفك جوايا، لحمى ودمى وهمى.. وتوبى.. رغم الشمس اللى بتضحكلى..

شكك فى ، رسم لى غروبى شال الحب اللى مغطينى، وبانت بعد الستر ... عيوبى!!

أنا آسف ماشى ومش راجع..
تمثيلك كان فعلا بارع..
زى سراب المية بيخلق،
وسط الصحرا الصفرا.. مزارع..
ننى عنيك، كان ينادينى،
أصحى ألاقينى،
ف وسط الشارع!!

أنا آسف جدًا علشانك.. لما أنا هابعد عنك فكرك، مين هيطبب كف ميز انك مين هيلمع كرسى العرش، ويقبل بعدى يكون سلطانك؟ مين من بعدى يا ست الكل، هيسال فين.. أصبح عنوانك!؟

# ٣ رغم إني..

الوداع.. رغم إن القلب جوايا بيتمنى اللقا.. رغم إن الدنيا وياك رقيقة محندقة.. باستريح قوق كفوفك، بعد عمر ملان شقا.. بانطلق،

> باحلم ببكره... برا سور الشرنقة.. رغم إن، ورغم إنى... طب وباهرب ليه بقى!؟!

٧ في الحاجة والاحتياج..

## (الثامنة عشرة)

#### ١- يا سلام يا ست !!

بص سواق جوا تاکسی، کتیر علی کنت أنا لابس ساعتها حته هیه کنت حالق دقنی و ملمع حذائی جوا جیبی، کنت فرحان بالماهیة..

زادت البصة وأنا ف حيرة صحيح حاجة تانية القعدة فوق كرسى مريح يا سلام ع الست صوتها هزنى.. والكاسيت شغال كما الكتكوت فصيح والكاسيت شغال كما الكتكوت فصيح

خطوة أتقدمها أبقى جوه منه شد رجلى ، إيد بتحبى، حاشتنى عنه شوفت أصغرهم و لادى.. بيبتسم..

انتهت حيرتي، وقصره، هربت منه!!

#### ٢ الشكل .. والمضمون

وزعلانه عشان بابا بیتأخر.. یا حته قشطهٔ متحلیهٔ بالسکر.. یا ضی عیونی... یا بنتی..

> أسلم، لأ، مسلمشى.. وأتكلم متسمعشى.. ولو بصبيت بتأمرنى، أدير للفضا وشى..

یا ضمی عیونی، یا أحلی من الكرملة.. والبسكوت.. أنا مهما تقولیلی، أقول: طبعا، أكید، مظبوط..

وغضب عنى يا بنتى أنا، مضطر أتأخر عشان أكسب فلوس أكتر..

عشان تفضل عنيك الحلوة، تتبسم وتضحك لى وأوفر لك حياة أحلى وشكل أرق من شكلى..

#### ٣- الخطوط الفاصلة..

الزمان مكسور بطبعه..

زى زلزال خد أساسه،

وساب توابعه..

والغلابة..

من روايح الأكل شبعوا...

قلنا إيه.. رمضان كريم..

و الخطوط الفاصلة يا ابنى، كالعلاج من غير حكيم.. العلالي فوقيها و احنا ، استغفر الله العظيم..

الخطوط الفاصلة ، فاصلة،

عنى حتى الإنسانية..

فاصلة أرضى عن سمايا.. نظرتى عن نور عنيا مهما نمسح فيها، فيها كل ألوان الأذية..

قولنا إيه؟!.. القول دا قولك..

إحنا دورنا كان لغاية يوم وصولك..

الأمل إنت وأوعى، تحتجب مهما قالولك!!

## (التاسعة عشرة)

#### ١- طيف الغلابة

ملعون يا طيف الغلابة

كابس على نفاسي..

مقاسمنی فی لقمتی، وراسم لی احساسی أبعد بعید عنك، أكدب و أقول ناسی...

ع الوشوش ألمحك، فوق الجبين راسى أجرى عليك أحضنك، وأشرب معاك كاسى تتكرر الملحمة وأنا وأنت بنقاسى...

أنا مستحيل أكرهك،

رغم اللي جاري لي...

هتروح بعید هندهك، أحكی وتحكی لی أشوف علی جبهتك، مأساة شباب جیلی تشوف علی جبهتی، شدة سمار نیلی نركب نقدف سوا، یتشد بیك حیلی و ع الوداد و الأمل.. ینصر مندیلی

ملعون يا طيف الغلابة، لو يوم تكون أراجوز.. تستطعم المسألة، وتقول نصيب وحظوظ.. جرب وخش السبق.. صدقنى ممكن تفوز!!

٢ درسالة إليه

سایفك و انا باضحك، بتمنع ضحكتی.. أصرخ علشان أحتج، تكتم صرختی.. أبعد بعید عنك، تبطل حجتی.. تفرش طریقی ورود... تجدد صحبتی..

لو بس تفهمنى، أنا مش باكرهك... أنا مش باكرهك... أن ليك وبيك ومعاك ودايما بافهمك ويايا فى الرحلة... شريكة بتظلمك تكره حبوب الفول... وتحلم بالسمك..

ليك حق لو غيرت في، نظرتك...

طب تعمل ایه لو کات حرمنا.. زوجتك! مضطر غصب عنی، أنهی عشرتك يصبح طريقی بعد عشرة كام سنة؛ مش سكتك.

مضطر غصب عنى، أفتح للأمل.. شكل الحياة وياه أكيد زى العسل تضحك سنين الأربعين بعد الزعل اهلا بدنيا الجد.. بيباى للكسل!!

### ٣۔ إفراج

جوالك أنا عايش سجين... هتفك إمتى السجن دا؟ مقهور وطحناني السنين... وانت تقول: معدن، رضا!

> الحمد لله بس مين... هيغطى لحمى إن بدا؟ مين من صفوف المرتاحين.. إن جعت هيجيب الغدا؟!

مين لو تعبت وقولت: آه.. لأهاتي هيكون الصدا؟ جواك أنا رافض أعيش... بطل بقى على ندا!!

### (العشرون)

#### ١- عاوزين ناكل!!

بجوار صناديق الزبالة..

ف قلب منها..

متشعبطيش على حيطانها،

بشر بـــ ودن"، و عين "، و "فع"..

البطن فاضية وعاوزة "مم"

اللى تلاقيه

مع غیر م حتی تبص فیه،

ع البق فورا .. زيح يا عم ..

بجوار صناديق الزبالة..

لا تقولى صفوة ولا حثالة..

الجوع بياكل أي شئ،

لو حتى كان معجون بسم..

#### ٢ـ العجوز .. وهنادي! ١

- بص یا بنی شوف کویس؟
  - المعون فاضى يا أمى..
- فاضى إيه، دأنا نايمة باحلم
  - شيخ كبير بيقولي "لمي"...
    - يبقى قلبك، حد سبقك؟!
      - -مستحيل!!
      - طب بس سمی!
- يا بنى كتر ألف خيرك، إنت مش فاهم مرادى
  - لو أنا هاكل و هاشبع،
  - يبقى إيه ياكل و لادى..
- سيبنى أدور يمكن ألقى.. حاجة ف صفيحة هنادى!!
  - يا أمه إيه تحوى الزبالة
  - غير قرف ووجع دماغ..
  - اللي باعتر فيه بابيعه... حتى لو جاب قرش صاغ!
    - والمعاش؟
    - منین یا حسرة
    - جوزى على كادر الشحاته..
    - كان موظف كل دخله... بدوب بأكلنا بطاطا!!

#### -والنتيجة؟!

- يوم وراح... بكره يمكن حظى أحسن.. علمتنى الدنيا يا بنى ... مهما أصادف عمرى م أحزن قلبى حاسس بكره جايللى... رزق واسع يملا مخزن يا للاشوف مصلحتك إنت ... وسيبنى جوا الحلم أسكن!!

#### ٣ عينات

الفقير يعيى... يموت، يندفن تحت الشطوط.. منذ أول يوم ولادته، ارتضى كل الشروط.. باع لنا نفسه، ودفعنا، تقله وأكثر... بنكنوت!!!

الفقير انسان وصولى...
سحنته خطوطها مغولى..
أينعم مع كبر سنه، فولى أصبح أبن فولى
هو نفسه، كل أمله، تبقى حتى السنة لولى..

الفقير انسان أناني..

يجرى إيه لو عاش يصارع أو يعانى.. حكمة المولى كدد!!

الأصول، يشكر .. يقول: "معدن رضا"!! ليكو أنا يا اللي معاكو الزاد.. فدا!!

الفقير بصراحة زودها كتير..

يبقى أفضل لز على مركب قذر؟؟ ملعون حقير يتنفى ف أقصى مكن..

صحرا مليانة عقارب.. و لا بحر ملان حيتان...

بس لو يحصل، ساعتها مين يكون الباشا، مين الألعوبان؟! مين هيأمر.. مين يلبى.. مين يموت علشان نبان،!

يبقى أفضل لينا منهم .. بنا تفضل عينات على الفطار الصبح علقة .. سخنة من باب الاحتياط في الغدا واحدة مماثلة .. ضرورى لضمان السكات أما في السهرة، ففاصل .. قهر وكآبة وعياط

## (الواحدة والعشرون)

#### ۱۔ دنیا

دنيا وفيها الفقير رخيص محطوط كمادة للحديث على مسوائد الغناى.. فاتح شهية مفيش كلام فاتح شهية مفيش كلام جمب الدنادى والحمام ولذيذ قوى مع طقم شاى.. لسو حب يخرج م الطبق أو ع الغلاف أصبح نبأ الكل هيقوله يا باى..!!

## ٢ الموت فقرا ! !

يموت الغلابة بدون حد أقصى..

يمونوا وقلوبهم بتنبض حياة.. وننى عينهم مفتح يمونوا ومصيرهم ما بين لأ وآه.. إذا البند يسمح وآخر المتمة..

لإما .. لإما

علیکم هترسی..

يموت الغلابة بدون حد أقصى وغيرهم يعيش.. لا ليهم في عملة، و لا مكافأة شاملة..

ولاخد وهات..

و لا سافروا بره، وعادو بصرة..

من الممنوعات..

كبيرهم سيجارة، وصحنين بصارة، وبصلة وعيش..

يموت الغلابة بدون حد أقصى و لا حد أدنى تشوفهم فى صحن الجوامع.. وفوق الرصيف..

هدومهم تملى نظيفة.. وريحهم خفيف.. و لا كانوا تابع..

لتالت ورابع.. متفهم يا سيدنا!!

#### ٣۔ تحدی

نفس حیرته کل یوم قدام دو لابه..
هی حیرتی..
تفرق إنه، من كتیر بینقی و احد،

أما أنا هو واحد.. اللى حيلتى .. فكرك انت، الموكيت بتاعه بكسب لو هيتحدى حصيرتى؟! ولا فاكر إنه يقدر بالبواكى تكون له قيمتى؟! يا بنى فوق، صحصح، يا بنى فوق، صحصح، وما غركش.. وما تغركش طيبتى..

٨ في الموسيقي والألحان

(الثانية والعشرون)

أويريت "السفير عزيزة"

المجموعة:

السفير عزيزة

قرب يا وله

الكبار بريزة

والصنغار بلا

بص شوف یا حضرة

بعد البسملة

إحنا مش بنسحر

أو نقول جلا

واللي شاف بيفهم

قبل اللي قرا

إحنا منكو وانتو

أصل المسألة

والساعة دى ساعة

أنس وصعللة

يا للا يا للا قرب

وأفهم ما جرى

#### ١- الخطيب المحترم

المجموعة : الزمان ساعة العصارى

والمكان إحدى الحوارى

والحكاية شاب مجدع.. لسه متخرج وشارى

جوه قلبه الحب زاد.. قال يا واد بطل عناد

قام بنفسه عشان م يخطب.. زى غيره من

الولاد!

الشاب : اسمى الثلاثي أحمد... محمود أبو الكرم

متربى على المبادئ... متمسك بالقيم

الأم : باين عليه.. مريش

الأب : وشكله محترم

الشاب : علمنى أبويا أكافح ... أبدأ من العدم

أبنى بايديا بيتى.... أدوق طعم الألم

الأب : نعم العلام يا إبنى...

الأم : والله كلامك حكم

الشاب : ستاشر عام دراسة.. وغلاسة وحرق دم

كأن كتابي قاضى.. وكأنى متهم

الأم : اسم الله عليك يا إبنى .. وسلامتك م التهم

الشاب : كان نفسى يكون معايا.. فلوس رزم رزم رزم أأسس بيت خرافة... و لا بيوت العجم أصيف في الريفيرا... و أشتى في الپرم بس الفقر ملازمني... بيني وبينه عشم مهما بعدت يلاحقني... ويسلمني العلم!!

الأب : يعنى الخلاصة ماحي..

الشاب : لكن صاحى

الأم : ياسم!

الأب : بالشكل ده يا ابنى .. بنتى هنتظلم

هتعيش تاكل أماني.. وتبلع بالندم

فتح عنيك معايا... وأمسك ورقة وقلم

وأحسبها بأى صورة... تجبرنى أقول "نعم"!!

المجموعة : فكره ودى كتير وجاب عاش حاجات مش في الحساب

غصب عنه قال لعمره.. نفترق أحسن صحاب وابتدت تاني حكاية.. كل شابه وكل شاب

## ٢. جوا الأتوبيس

المجموعة : زحمة أتوبيس وياما،

جوا الأتوبيس زحام..

ركاب آخر أيامة... ما بين صاحى ونيام

وهنوصل بالسلامة... وملوش لزمة الكلام

رجل مسن : أتوبيس عشرين بشرطة ... ممرش من هنا؟

أحد الواقفين : عشرين ، عشرين ، م أظنش

الرجل المسن : يسهل رينا..

أحد الواقفين : أتوبيس عشرين وصل!

الرجل المسن : يا سلام يادى الهنا

احط رجلی.. أركب،

راكب على السلم: شوف شغل المسكنة

إحدى السيدات : لو تسمح سنة جوا

راكب السلم: ولا ضرس يا ستنا

الرجل المسن : يا ابنى السجارة، عينى؟

راكب السلم : م تبطل عكننه

راكب آخر : سيبك يا عم منه.. خلينا ف شغلنا

شوف لى الواد الصعيدى... أبو السة ملونة؟

راكب السلم : معهوش غير البطاقة.. "عزوز" مواليد قنا

الراكب الآخر : طب والبيه الموظف؟!

راكب السلم : نطشوه اللي قبلنا..

الراكب الآخر : يعنى هنرجع فوارغ؟

راكب السلم : مش غصبن عننا

الكمسارى : تذكرتك فين حضرة؟

الراكبان معا : يا أخى غور من وشنا

"يقفز ان من الأتوبيس"

بائع : ألبوم، جلدة، بطاقة

راكب : ورينا العينة

شحات : شه

راکب : کان من عینی

راكب بملابس بلاية : فينك يا أم الهنا

الكمسارى : تذكرتك؟

راكب : اشتراك

راكب أخر : نفس الكلام أنا

راكب على السلم: يا عالم خشوا جوا...

جوا أروق من هنا

راكب يحذر : أوعى تصدق كلامه

دا جوه معجنة

المجموعة : ويشيل اتوبيسنا

الناس... ويحط

ناس م الشباك تقفز وتنط

ناس عاملة أسد، ناس عاملين قط

ناس وسط الناس عمالة تعط!!

## ٣- السلم الوظيفي

المجموعة : موظفين كتار،

ع المكتب تنابلة...

تفكيرهم ليل نهار ... مين فيهم يمشى قبله

والسلم الوظيفي... وإعانة الغلا

قرب وشوف يا سيدنا... واتفرج يا وله

" حجرة للموظفين بها ثلاث مكاتب متشابهة، ومكتب رابع كبير،

"مساح أحذية أمام أحد الموظفين.."

موظف ١ : يكلم ماسح الأحذية: يا واد خلص بسرعة.. أنا

عندى راندفو

موظف ٢ : بكلم عامل البوفيه: يا سلام لو جمب شايك..

#### لقمة وحته جاتوه

موظف " : يحل الكلمات المتقاطعة: خمس حروف لشاطئ

موظف : جرب تكتب مايوه!

"رجل مسن يدخل ممسكا ببعض الأوراق ويتجه إلى مكتب موظف ١"

: لو تسمح با بني، ورقي... من شهر بتطلبوه

موظف ١ : (لا يلتفت) شفت أمبارح شحاته

موظف ٢ : يا بنى الشوط ع الجوانب

مفروض بكون "سرو"

(ينطلق صوت آذان الظير)

عامل البوفيه : الضهر إدن يا عالم

يا أخواننا وحدووه

الرجل المسن : يا أخواننا حرام عليكم

أروح لمين يا هووه

هو الورق دا كوره

لبعض تلقفوه

موظف ١ : يا أبويا أستني دورك

موظف ٢ : (بعد سماع رنين التليفون) حدش يقول "ألو"

موظف" : شفت امبارح محاسن... لابسه "انسامبل" یا هووه

مدير المكتب : شغل يا واد يا جمعه.. السح الدح إمبو

(يتحدث موجها كلامه لعامل البوفيه.. يقع الرجل المسن على الأرض)

عامل البوفيه : الراجل طيب ساكت... يا أخوانا فوقووه

المجموعة : ولسه بينا عايش

موظفين تنابلة

تفكيرهم ليل نهار ... مين فيهم يمشى قبله

والسلم الوظيفي ... وإعانة الغلا

قرب وشوف یا سیدنا... از ای تمشی لور ا!

## (الثالثة والعشرون)

#### مغامرات كتاكيتو

#### ١ـ غلطة!!

توتة توتة، هنحكى حكاية.. عن كتكوت تحت الشجراية مامته قالت له: متمشيش أبذا.. و لا خطوة إلا معايا

الكتكوت قال "نفسى أتحرك... أبعد عن شجراية التوت أدخل جوا الغابة أتمشى.... وأرجع آخر الليل مبسوط"

وابتدى يمشى وقابله القرد... سقعان بيتكتك م البرد قال له: "سلامتك" قال القرد.... "أهلاً أهلاً وش السعد"

بعد شوية عدا الفيل ....أبو زلومة أبو وزن خطير افتكر الكتكوت عصفورة... تعبانة ومش قادرة تطير

رفعه على الزلومة وقال:... "إنزلى عند اخواتك فوق" العصافير فرحت وباباهم... عامله برقه وحب وذوق

ف الصبحية العصافير طارت.. والكتكوت حاول معرفش لمحه التعلب، عالطول قرب... قال له: "أنا جايلك.، متعيطش"

الكتكوت دقق واستغرب... "الشكل ده أنا ما أعرفوش لا كتكوت دقق واستغرب... ولا بطوط أبو وش بشوش"

وشویة وبشویش بشویش فوق الشجرة ظهر تعبان قال له: "أنا أولى یا تعلب منك... بالكتكوت وصحابه كمان"

الكتكوت عيط ودموعه... كتبت فوق الأرض رسالة ست نعامة خدتها وجريت... ادبتها للست غزالة

كان لازم يتدخل فورا... ملك الغابة ميستناش الكتكوت زقطط، والتعلب .... والتعبان قالوا: "رحنا بلاش"

ف الوقت دا كات ماماته بتجرى... هنا وهناك قلقانه عشانه إنطط عصفور متمكن... قال: "أنا أنا أعرف عنوانه"

وف وسط المشوار اتقابلوا.... يا سلام على فرحة كتاكيتو إتأسف وحلف ما يفكر.. يبعد يوم أبدا عن بيته!

## ٢ـ آخره التقليد!!

كتناكيتو قاعد تحت الشجرة... عامل نفسه بيعرف يقرا مسك القلم النونو بتاعه... ورسم أل إيه: وردة وجزرا ورسم دايرة مهياش دايرة... قال "دى الشمس هتطلع بكره"

بعد م خلص رسم اتنبه... للعداد أبو حبات صفرا قال: د أنا أشطر و احد يحسب... و أقدر أعد لغاية عشرة و احد أتنين بعديها تلاتة.. بعد تلاتة معنديش فكرة "

وشاف البط فى وسط الميه... قال "د أنا و اد سبيح من يومى صبركو بس على شويه.. هتشوفوا غطسى و هتشوفوا عومى" قرب أكتر، خاف م المنطر... قال: مقدرش أبل هدومى

الكتكوت شاف مشمش طالع... فوق الشجرة بكل سهولة قال: "دا طلوع الشجرة هوايتى... وواخد فيه الجايزة الأولى" مشمش قال له: "شجرتك مش معدولة"

بعد شویة حضر سی الحاوی... وفرد لوح ملیان مسامیر و ابتدا یمشی علیه بصعوبه... وسط التصقیف و التصفیر الکتکوت قال: حلم حیاتی... أعمل م المسامیر دی سریر!

حبة وطارت ست حمامة... فوق فى الجو مع العصافير الكتكوت قال: "ودى شغلانه.... د أنا طيار من يومى خطير" وطلع فوق البرج يحاول.. أتلخبط ووقع ف البير

جوا البير الحشرات ياما... نازلين ضرب وقرص وعض الكتكوت قال "بس سيبونى... أنا حرمت أقلد حد أنا من بكره هالم هدومى... وع المدرسة م النجمة هامد"

# ٣ أول يوم دراسة

جرس المنبه ضرب... كتاكيتو قام مفزوع على كتفه شال شنطتة... فيها كتب أسبوع ومشى فى طريقه يفكر ... وصوته كان مسموع إزاى يذاكر ويلعب... ويجيب كمان مجموع

توتة توتة وأبو الكتاكيت... ف المدرسة واد صاحى نشيط أول حصة ابتدى يتعرف... على كام كلمة بشكل بسيط فى الحصة التانية على الشاشة... شاف كل الأحرف فى شريط والحصة التائية ابتدى ينطق... كلب وقط وبط وبيت

جرس المدرسة يضرب تن تن ...الحصة دى علينا علوم الكتكوت يسأل أستاذه:... "إشمعن البطوط بيعوم" "إشمعن العصفور النونو... يفضل طاير طول اليوم" الأستاذ ببساطة شرح له... والمجهول أصبح معلوم..

جرس المدرسة يضرب تن تن ... درس حساب مليان أرقام "كتكوت أفندى أتفضل جاوب... واحد زائد واحد كام" وإن زودنا المجموع خمسة"؟... الكتكوت قال: "سبعة تمام" كل الفصل يصقف يهتف... "يا سلام ع الكتكوت يا سلام"

جرس المدرسة يضرب تن تن .. الحصة دى نغنى نشيد الأرنوب نقرع الطبلة... والعصفور قسم ع العود والكتكوت ع الأورج إتمكن... عزف اللحن بشكل جديد كل الفصل واره بيدندن... والكتكوت فرحان وسعيد

جرس المدرسة يضرب تن تن... آخر حصص اليوم ألعاب في الأول نجرى ونطنطط... بعدين نلعب كورة شراب الكتكوت جاب جون محصلش... والأرنوب أهو راخر جاب خلص الماتش ابتسموا وقالوا... "نكسب نخسر، إحنا صحاب"!!

توته توته توته توته... خلصت يا حمادة الحدوته واللى يغمض عينه هيسمع... بكره الصبح كمان حدوته واللى يروح في النوم هنجب له... م الأحلام لعبة صغنتوته

ثانیا: إهداءات

# إلى روح أبى..

عودتنى ع السماحة.. والطيبة.. والأخلاق وادتنى كل المبادئ.. من الألف.. للياء وسبتنى يا با بدرى وحدى مع الأوراق..

بديت وحبة بحبة.. استطعم الأشياء لقتنى يابا ف غابة، فيها الصحاب أعداء..

فكرت أرجع لقيتك.. واقف بتنهانى حسيت كأن ايديك.. بتشدلى ودانى حسيت كأنك معايا. حسيت كأنك معايا. مبقتش وحدانى..

رجعت لى تانى السماحة، والطيبة والأخلاق يا أغلى قيمة في حياتي، يا أغلى قيمة في حياتي، يا أنبل الأشياء!!

# إلى روح أمى..

أمل أتولد.. والتانى مات،، وأنا لسه مخنوق بالعياط.. فينك يا ست الكل، يا صابرة، يا أغلى الأمهات..

وفاضلى مين بعدك يا أمى، ومين هياخد باله منا.. كلنا كبرنا ولكن.. كنت همزة وصل بينا لوف يوم حساباتنا جارت... حكمتك تعدل ميزاننا وإن في يوم الدنيا ضاقت.. قلبك الطيب يسعنا

أمل أتولد، وأنا بالمحك، قاعدة ومالية مطرحك. قاعدة ومالية مطرحك. وولاد ولادك يسألوا... عن أى حاجة تفرحك كان نفسى يومها استسمحك!!

۲

ولما الصبريا أمى فرغ صبره
ولما العمرحان تحريره من أسره
لقيت كل الملامح يا حبيبة الكل، بتسلم لأمرالله
معدش خلاص مجال تانى لقولة آه.

بيدخل عملك الطيب..
بيشفعلك..
باحس النور ملاك ابيض.. بيندهلك
ويتلبى.. يا ست الكل.. رغم الكل،،
حواليك،،
بيتمنى يكون قبلك!!

## إلى شريكة الحياة

بتسألنى عنيك السود.. عن الموجود.. في دنيايا..

بتطلب منى أحكيلها...

عن اللي عملته في صبايا...

ولو أرفض تعاتبنى، تقولى: مش أنا مرايا. ولو احكى.. تخاصمنى.. وتعمل زعلة ويايا..

يا ست الكل كان عندى كتير..

دلوقتي وحداني..

نجيب سيرة اللي فات طب ليه،

غرامك إنت.. نساني..

على ايديك اتولد قلبى، وشاف الحسن ربانى وف عينك ابتدى يتهجى، يتعلم كلام تانى يا ست الكل أنا قابلك، على عيوبك ومهما تنقصك خبرة، أنا في الحب.. محسوبك!!

# إلى روح أول أبنائى الذى مات ليلة ولادته.

يا ما كان نفسى أصبح أب... ويكبر أبنى ويصبح شاب...

بس خسارة الواد من ضعفه... جوه مكانه غطس ولا قب

لو كان يعرف بس يعوم...

ولا يصرخ ولا يلوم...

كنت لأخر الدنيا أوصله... وأدافع عنه عشان مظلوم

مات یا خسارة فی عز صباه...

ولا قال لأه ولا قال أه..

مات وكأنه بموته بيلعن... إن الموت في الدنيا مناه

مات اللي ما ليش قبله ونيس...

مات في ليالي الزفة فطيس..

مات ومصبر قلبي شوية... إن أنا شفته ليلتها عريس.

# إلى روح المعلم/محمد الزعفراني

وسط الزحام قالت: يالهوى أنا أتنشلت

صوت من اليمين قال شفتها... واحدة جميلة كانت بتخطب ودها صوت م الشمال قال لأصبى... شاف شنطتك قال مطلبى ويمين شمال ولا حد للمحروسة قال.. مين اللي خد رزق العيال

وسط الزحام قالت: "يالهوى... أنا اتفعصت"

صوت م اليمين قال اسكتى... يعنى يا ستى ضرورى تهرى وتنكتى

صوت م الشمال قال بس هس... اللي مالوش في اللعبة دى يركب له تاكس

ويمين شمال، ويوماتى يتكرر سؤال إمتى يا رب يتوب عليك ويرزقك بابن الحلال

إمتى يارب يتوب عليكم كلكم من دا الزحام ف البيت وبس يكون لكم أكبر مقام وتحسوا بعد الغلب تانى... بالاحترام.

## إلى روح الإنسان: مجدى عمر

صاحبى نهرنى، قال عنى واخد ع السلف لو كان سألنى، كان جاوبه لونى اللى اتقطف

كان جاوبه عنى نظرتى، للفاكهة على عربية خلف كان جاوبه عنى لهفتى، للحمة فوق صحنين خزف كان جاوبه عنى اتنين صغار، كل اللى باملك من خلف نايمين ليلاتى يحلموا، بفطار خلاف فول العلف

صاحبى نهرنى، قال عنى عايش ع الصدف فكره إنه يقدر، ينقلنى لحياة الترف وفجأة أصبح لا ديون على .... ولا سلف

صاحبى ظلمنى،
معرفش طبعى مع الأسف.
ومدى ارتباطى، بالفقر لحدود الشغف
لدرجة إنى، بسعادته فى الحته اتعرف
تسأل يقولوا، فقرى بمرتبة الشرف.

# إلى روح السياسي: عبد الفتاح الهنيدي يروح السيام زيادة المرتبات

كل يوم أنا كنت باحلم بالنهاردة.. كنت شايف فيه حاجات غير المشاهدة.. كنت طمعان يبقى فيه كرم اللي عدا، بعد م حماس العمل خد منى وادى، جانى تقديركم كدش المياه.. باردة!

ربع ساعة
فضلت أقرا ف الرقم..
اللى كتبه أكين لأولادى ظلم؟؟
ولا يمكن ديه كات غلطة قلم؟!
مش هقول إنى كفاءة أو علم..
مش راح أنكر فضلكم يا أهل الكرم..
بس كان عشمى،
و آه...

ورغم احساسی، أنا، غلطان و آسف الظروف وحشة، وسیدنا "السوق" مناكف من هنا ورایح هندلالی الخفایف مرة لحمة، مرة نواشف.. وعشرومیت مرة نواشف.. عیش و دقة، یبقی أطعم م القطایف

يا سلام ع الفلسفة... وعلى الوظايف!!

# إلى روح (الدينامو) عادل جعفر

أنا كنت باضحك زيكم.. وكنت لما تسألوني رأيي فيكم.. أقولكم..

أنا كنت مالى مركزى... دلوقتى مطرح دنيتى ما تقول جلوس... أنا أترزى.. طب أيه جرى؟ الفقر عكس المسألة.. أثر ع الكبد... انهرى.. بعد البريمو... تملى تلاقينى ورا.. بعد الحمام... أصبحت مش لاقى الدرا..

أنا كنت واد متهمنيش كل الكنوز.. بكدى أكسب وأشترى كل اللى أعوز.. بعقل رايق كنت أطلع م التراب، حبات فروز م الفراغ... أكل وغموز.. طب إيه جرى الأفقرى.. يجوز.. ولا الحياة زى ما قال جدى وجدك كل شئ فيها. حظوظ.

# إلى روح عاشق الدعابة محروس عبد المعطى

الليل بتاعى لما ليل وأنا لسه عيل باكتب على لوح اردواز باكتب على لوح اردواز مخلوقة تشبه للبشر.. زى القمر بصت لى من خلف الإزاز

مديت ايديا .. لستها ضحكت لى .. نور سنها كتبت لى فوق لوح الخشب كلمة وجازا.

من يومها وأنا باحلم أزور سيدنا النبي!

إلى حملة الراية خالد. يحيى. جيفارا

اسمحيلي..

قبلم نحصل محطتنا الأخيرة..

قبل دقة قلبى م تكون لك أسيرة..

انسحب، واسحب معايا

اعترافي..

اللى عشته بقربى منك، لى كافى حتى لو هاسكن لوحدى فوق جزيرة هابقى أنا الشاطرحسن. وإنت الأميرة!

اسميحلي..

قبل م نسلم لنظرات العيون اسألى نفسك وجاوبى، مين تكونى.. ومين أكون.. يا ما كنت عليك أنادى.. كنت أنا ف وادى وكان قلبك ف وادى.. والنهاردة.. بعد م شابت سنينى بعد م فراقك صبح مكتوب جيبنى

ابتدیت تحسی بئ. وتنادینی اسمحیلی انسحب، قبل میفوت الأوان اللی فیه فکرنا أصبح، زی أحزان الکمان.

سنبلة من غير عيدان. في الفضا متعلقة يوم من الأيام هتطرح. طرحة بيضا مزوقة تلبسيها، تزين جبينك.

تخطرى .. تضحك سنينك ..

تبتدى تعيشى وتنسى.. اللى كان بينى وبينك يبقى دمعة جوا عينك! يبقى دمعة جوا عينك! اسمحيلي..

قبل م نحصل محطتنا الأخيرة قبل دقة قلبى م تكون لك أسيرة انسحب واسحب معايا.. اعترافى اللي عشته بقربى منك لى.. كافى حتى لو هاسكن لوحدى فوق جزيرة هابقى أنا الشاطرحسن... وإنت الأميرة..

### إلى سارق السنوات: مجمع الفنون

وقالوالى أنت مدير المحكان ومن فضل حضرة جنابك... تبان وتلبس وتصرف وع الكل تشرف وأوعى تحن لحياتك زمان

وقالولى أصرخ كما الديناصور وأشخط وانطروزعق وثور وإياك تحاول يكون لك حضور

صراحة كلامهم... معداش ودانى برغم إن حلم الإدارة احتوانى

وبعد التهاني... وبعد الجاتوه لقيت إني هاصبح مجرد "بانوه" وفوق منه صورتي وأنا شخص تاني وقبل ما أصرخ وأقول مش بتاعتى لغيرى ارتضوها وكان أحلى بارتى وزعلنى إنى ... وزعلنى إنى ... مفيش حد زارنى ... ولا حد م الخلق ... قدر ... طيابتى

## إلى علامات مضيئة على طريق الصحافة المصرية جلال الدين الحمامصي/ على ومصطفى أمين/ صلاح حافظ

وكان نفسى أكون صحفى،
لكن ضعفى،
مكان م بقيت،
بقيت مبسوط
مجرد فتلة وسط خيوط..

وزى الفتلة، لما بتنقطع بتموت... صدر حكم الحياة ضدى، بتحويلي إلى كتكوت... وترحيلي إلى البيضة!!

## إلى الشاعر المحلاوى: فريد معوض

سمعتنى حبرة جمل... رقيقة حلوة مزوقة صدقت إنى بقيت علم... من بحرى لما الغردقة وخرجت للناس اترسم... شبعت منهم تريقة!

بطل بقه.. ادینی حته لقمه حاف.. سکنی اوضه محندقه..

وفرلى كام هدمه نضاف.. يكفونى شر الشزنقة مهو مستحيل أقدر أعيش.. طول عمرى ف بحور الشقا

بطل بقه..

فاض بى كيلى وهانطلق.. برا جدار الرشنقة هتقول ساعتها يتفلق.. مهو أصله أكل وبحلقة

يمكن ساعتها أكون أنا، عديت حدود المنطقة.. عديت عدود المنطقة.. يمكن على رقبتى بطيابتى.. ألف حبل المشنقة!

#### إلى مجهولة العنوان

وآخرتها؟!
وآخرة قلب متعلق فى خلجاتك..
ومتغطى، بخلجاتك..
ومتمنى... يضم حياته لحياتك..
هيتصرف معايا إزاى،
إذا ليلة العدل جاتك!!

باحبك شعر، أغنية وفوق الشط... شمسية.. بافكر لما أكون جمبك... بحرية...

متتعداش خطاوينا، حدود الحلم إذا كان عدل او كان ظلم..

متتعداش خطاوينا طريق مرسوم

بحبات الفراق.. ملضوم..
نصالح يوم.. نخاصم يوم...
وآخرتها؟!
یا ست الکل أنا انسان... منیش معصوم!

#### إلى الأديب السكندري: علاء خالد

زى النهاردة.. من خمستاشرسنت، اللي جوايا أنا .... مشهو أنا...

اللي جوايا أنا، مثل على الفلسفة....مسك إيديا المغرفة عزم على النور... اختفى وقاللي: إغرف... هذا إناء المعرفة

بصيت لمضمون الإناء... بصيت لشكله الخارجى مضمون مزوق، محطوط ف شكل نموذجى...

> اللى خرج، خالف مبادئ ومنهجى.. اللى خرج، انسان وصولى.. أونطجى.

> > غطیت عنیا، بمعطفی.. قولت اکتفی..

ناديت على الخل الوفى.. كان كل أملى يكون صديق، ينقذنى م الموت البطئ.. كان كل أملى الفكريصحى، يحدد اليوم، والطريق..

ولحين ما يصحى الفكر، ويرد الصديق.. ولحين ما تنعقد المحاكم، تتخذ موقف جرئ.. أفضل أنا، افضل أنا، سجين أنا، رغم إن أنا... انسان برئ!!

# إلى روح المرحوم/ صلاح عبد المتجلى وكيل وزارة الثقافة في الثمانينات

١

مؤهل.. مؤهل.. مؤهل.. دا كان يومها إسود حقيقى.. منيل يغور دا المؤهل.. وأتمنى أرجع ولوحتى عيل.. أروح روضه تانى... أحقق من الصفر تانى الأمانى...

وأدخل صحافة... أعيش عمرى بس النوبة دى بنضافة... بعيد عن سياسة الغلط والهيافة... بعيد عن سعادة وكيل الثقافة.. ۲

ملعون أكون، لو يوم أنا أطلب أروح هيئة فنون.... وإيش أكون، واللي مانعني بيه كبير شاءت ظروفي، وكان على إدارتي... مدير...

> فوق الطلب، كتب الكلام.. منع الكلام.. منع النفس والابتسام..

حتى التفاؤل والأمل.. كتب يقول: مفيش أمل. إلا الفنون..

دا يبقى ضرب من الجنون حسيت بلون الحبر الأحمر.. دمعتى وصرخت اقول: من حقى آخد فرصتى دىقضيتى... حريتى... إن كان سعادته هناك تعب إن كان على أمره انغلب أن المستحيل أكون سبب. للأنتقام فرصه لتخفيف الألام...

أنا بشر

أنا لى رب، ولى حق، وهانتصر..
مهما سعادته لأصل موضوعى.. احتقر
مهما بحكم الأسم، ووظيفته... افتكر
انه هيقوى حتى فوق كلمة قدر!!

٣

بدون ما يبص في الورقة.
بدون ما يبص لعنيا اللي كانت بالضني ناطقة..
بتكشيرة، وتأشيرة، كما لون المداد زرقة
كتب بحروف غضب زاعقة،
يقول: لأ..

أنا أسف، ومش ناصف سعادتك لو تجيب ألوفات.. مكانك فوق، نزاهة وذوق، في وسط زمايلك البهوات..

وأقول أنا إيه، لأستاذنا المدير البيه، ودا رأيه؟! أعيش وخلاص، ف وسط الناس، على رأيه؟! على رأيه؟! أعيش ترابيزة أو كرسى، أعيش ترابيزة أو كرسى، على قهوة نشاط منسى. واترجم على نفسى؟!؟

انا نفسى أقول: لأه.. منيش قاعد على الكرسى.. منيش كرسى منيش ورقة بتتسرك مع الجوابات أنا إنسان بيتحرك ولى سمات أنا أرفض تكون سيرتى كلام ستات!

> أنا نفسى أقول لأه.. أقولها بصدق وبحرقة.. أقولها بقوة وبجرأة..

أقولها قبل يوم م أبقى، باعيش ترابيزة أو كرسى، على قهوة نشاط منسى، واترحم ساعتها صحيح، على نفسى!!

#### إلى أول السطر: طارق الهنيدي وصلاح الخطيب

لما كنت أقعد لوحدى، كنت بحلم يبقى عندى، كنت بحلم يبقى عندى، أى لعبة بزمبلك...
أى لعبة بزمبلك...
أملاها تمشى مشيتى.. أضحك تقلد ضحكتى وتبقى هى جاريتى... وأنا الملك...

عدت الأيام على عبرت الأحلام شويه... كبرت الأحلام شويه... زاد عددها وحجمها... وف وسطها.. لحت إنى بامتلك... عروسة حلوة بزمبلك!!

عنيها ف خضار الشجر.. ضحكتها نابعة من القمر.. وجمالها رباني بيرتاح له النظر.. مليت عروستى وسبتها، تمشى وف الدنيا تجرب.. حظها..

عروستى لسه صغيرة.. متحيرة.. لوتمشى خطوة للأمام، ترجع عشر خطوات ورا.. حاجات كتير غيرى عليها.. مأثرة..

عاشت دقایق عمرها.. مترفهت.. سلوفان رقیق... بیلفها.. ف علبت شیك، مالهاش شریك... غیر نفسها.. تقفل وتفتح، للی یمدح.. حسنها..

فضيت عروستى، وخدتها... رجعتها.. ومن بعيد وسط العرايس.... شفتها..

دبت حلاوة الروح في تعابير وشها، مدت إيديها... شبكتها ف بعضها... رقصت وغنت، هي وبنات سنها...

غمضت عينى، حلمت إنى بقيت ملك... وعروستى وسط الحلم بتغيير مكان الزمبلك!!

#### إلى روح الزميلة الغالية... فاطمة اسماعيل

ولو كان للمحبة رسول.... لكنت إنت ولو كان للصداقة فصول... لعلمت ودرست ولو كان للصموح دستور... لفهرست وبوبت ولو كان للطموح دستور... لفهرست وبوبت تملى الضحكة فعنيك، تخلى الصحبة حواليك... معاك أينما كنت

وافتكرك وأستاذنك، بيفتح للفنون بابك باعيش قصة نجاح بهرت عدوك قبل أصحابك ومن يومها بتتعاهدى مع نجمة أمل وردى... زرعها الفرح في سحابك

وبافتكرك يا أستاذة، بتبتسمى....
ورغم المنصب العالى، مفيش ولا مرة تترسمى
ولا يكون الكلام رسمى
تحبى وتعشقى عملك،
ونشر الفن كان أملك... بدون اسمك ولا اسمى

وبافتكرك إذا أرغمت على التكشير وكان لازم قرارياذى ساعتها كتير بسرعة تضحكى تانى، بسرعة تضحكى تانى، وتنسى مهما بتعانى.... عشان قلبك حقيقى كبير

وبافتكرك ويفتكرك، مجمع للفنون، والقصر وياما عروض حضرتيها، وأعدادها تفوق الحصر وأوراق ياما مضيتها، تحقق للضعيف النصر وندعى كلنا يا رب، لأطيب روح وأطهر قلب، برحماتك تغمدها.... وتلهمنا العزاء والصبر

#### قراءة في الكتاب

على الرغم من البناء التقليدى الذى يستوعب معظم قصائد الشاعر / بدر الدين محمود، غير أنه تمكن من إكتشاف منابع بالغة الثراء بداخل هذا البناء الذى مازال صالحا لتقديم إمكانيات جديدة قادرة على إثارة إعجابنا وتجديد دهشتنا.

فالشاعر لم يكتف بإجترار الإنجازات السابقة لشعراء العامية الكبار، بل حاول أن يكتشف إيقاعاته الخاصة المتفردة، التي تستفيد من تلك الإنجازات، وتضيف إليها من ثراء التجربة وعمق الرؤية، والارتباط العميق بقضايا الواقع والناس،

كل ذلك في سخرية محببة، لا تكتفى بالإدانة، بل تتجاوز النقد المباشر لتلامس الحس الإنساني الذي تشوبه سخرية العاشق الذي يبوح بما يضنيه ويعذبه ويشقيه، بحيث يصل في النهاية إلى الجذور الحقيقية للظلم، حيث الأمل يظل السمة الدائمة التي تدفع برحيق الإبداع إلى آفاق رحيبة متنوعة تتأبى على الأفول،،،

الشاعر بدر الدين محمود، ناقد متمرس للحياة، يمتلك القدرة دائما على الإرتباط بطين الأرض، والانفتاح على السماء.

محمد كشيك

## الفهرس

أولا: ثلاثيات
١ – في حب الوطن
٢ - في الصبا والشباب
٣- في الزاد والزواد!! 5
٤ – في العمر و السنوات!! 1
٥- في الصدق والصداقة
7 – في الود والوداد
٧- في الحاجة والأحتياج
٨- في الموسيقي والألحان
ثانيًا: إهداءات
قراءة في الكتاب

#### التعريف بالشاعر

- بدر الدين محمود. مواليد القاهرة (الجمالية) ١٩٥٠.
- كبير أخصائيين بقطاع الفنون التسكيلية بوزارة الثقافة.
- مدير ملتقى (المبدعين الصغار) منذ انطلاق فعاليات دورته الأولى بمجمع الفنون بالزمالك.
- المشرف على درس الأطفال بقاعة الصوتيات والمرتبات بمتحف الفن المصرى الحديث.
- يكتب الشعر والقصة القصيرة، ونشر له بجرائد: القاهرة، والعروبة، والأحرار. ومجلات: سمير والثقافة الجديدة.

#### لجنة الكتاب الأول

[مقررًا]

خــــــرى شــــــــــى أمسينسة زيسدان سييد الوكيسل شيرين أبو النجا عسز الدين نجسيب محمد كشيك مسعبود شهومسان مـــصطفى الضـــــع مـــصطفى عبـــد الله مـــهــدى بنـــدق

#### صدر من الكتاب الأول

١ - صــــحـــراء على حـــدة قـــصص عـاطف سليــمان ٢ - دراسسة في تعسدي النص نقسسد وليسد الخسشساب ٣ – حــــــدث ســــراً قـــصص أمــــينة زيدان ٤ - رسببوم مستسبحسبركسة شسبعسر صــادق شــرشــر شيعير عييد الوهاب داود ه - لیس ســـراکـــــا طـــارق هــاشـــم ٦ - احستسمسالات غسمسوض الورد شسبعسسر ٧ - تدريبات على الجملة الاعتراضية تـــصص مستصطفى ذكسترى ۸ - کــــــلــــالـــــرديـــــوس مبحمد السلاموني ٩ - مسرحيتان من زمن التشخيص مسرحية ٠١ - لـــــــــــــــــــــــن شـــعـــر هدى حــــــــــــن مستحسمسدرزيق ١٢ – حسفنة شبعسر أصسفسر تستصص مبحبمند حسسان ١٣ - يستلقى على دفء الصدف شسعسر عطيسة حسسن ١٤ - النيل والمسسسريون دراسسة حسمدى أبو كسيلة ١٥ - الأسماء لاتليق بالأماكن شسعسر عبزمي عبد الوهاب ١٦ - العسيفسيو والسيمساح قيصص خيالد منتسصير

مصطفى عبد الحميد دراســـة ١٧ - ناقيد في كيواليس المسترح عييند الله السيمطي نقسد ۱۸ - أطيهاف شهاموية غسادة عسسد المنعم قـــصص ليــالى أحــمــد . ٢ - - ----ارق الضــــوء نقــد جليلة طريطر ٢١ - رجع الأصحاء مــــاهر حــــــن ٢٢ - شــــروخ البوقيت شببعبسر قسيصص عساطف فستسحى ٢٣ - أغنيسسة للخسسريف مسرحية صلاح الوسيسمى ٢٤ - بائع الأقسنعسسسة قسصص شوقى عبيد الحميد ٢٥ - بائع الأقنع خسالد حسسدان ٢٦ - كوجمهك حين ارتحال الصباح شيبعيير روايسية أمسياني خليل ٢٧ - وشـــيش البـــحــر ۲۸ - ناصحیحی سلیحیسان ٢٩ - أغنيسة الولد الفسسوضيوي ٣٠ - سيوال في الوقت الطيائع خـــالد أبر بكر ٣١ - كــــرحم غــــابة شيبعيير ياسسر عسلام مسرحية شـــعــر أشــــرف يـونـس ٣٣ - جــــابع حـــسن صـــسرى ٣٤ - سـقـوط تمـرة وحـيـدة قــــصص سعسد أبو طالب شيسعيسر ٢٥ - أمــــيـات عــائليــة ناصـــر عــراق ٣٦ - مـــــلامـح وأحــــوال مححمد مسخستار ٣٧ - كــــــابة الصـــورة ناصبير العبسزبي ٣٨ - نــــاج الخــــوف مسرحية

٣٩- عناصر الإضحاك في مسرح بديع خيري مسحسمة وعسسمية ٠٤- أولــــــ أول مسحسمسد ناصسر حكايات ١٤- وهيج الكستيسيابية نقسسد حسسان بورقسيسة ٤٢- البنت مسسسرية قسسصص مستطفى الشبافيعي 27- قسبل اكستسمسال القسرن روایسسة ذکسسسری نبادر ٤٤- تجسري بسسرعسة فسائقسة شسعسر سيحسر سيامى 20 - تسفسكسيسك السروايسة تقسسد فستحى أبو رفيسة ٤٦ - نـــفــس طـــويــل قسسصص رانسسدا طسسه ٤٧ - الميتامورفوسيس في المسرح الحديث نقسسد مسسودة مسسهسدى ٤٨ - في السسنة أيسام زيسادة شسعسر جسمال فستسحى ٤٩ - مسساتحسساولش مسرحية مسصطفى سيعسد ۵۰ - الفن الفطري في مستصبير نقسسد ضسحى احسمسد ٥١ - كيائن خيرافي غيايتيه الثيرثرة شسعسس نجسسساة عملس ۵۲ - لون هارب من قلسوس قسنزح روايسسة منى الشسيسمي التيسلني السرمسليني فسسارس سسمعسد ۵۵ - رغـــــات روايسية أحمد عادل القضايي *٥٥ - لين تيدرك سيــــرك* ٥٦ - حــاجـات تانيـــة محمد عبد الحميد دغيدي ٥٧ - خـــــازنـة الماء شسعسر فتحى عبيد السميع متجندي عبيند الهنادي ۸۸ – قىسىس ولىسىمىسىق ٥٩ - عـــيــون ســمـارة اوبسريست فسسرغلي مستهسران محمد أحمد العشيري ٦٠ - السير نحو نقطة منفترضة

قسسصص أحسمند كسمنال زكي ۲۱ - وخسسسز کسسسان فيساطمينة فيبوزي ٦٢ - أثر الأعمال الأدبية في الملتقى نقسيد أحسميد الشيريف ٦٣ - الروائيسون المصمريون الجمدد قييصص أمنيسسة طلعت ٦٤ - مــذكــرات دوناكــيــشــوته نقسسد حسسانط ٦٥ - أنساق اللغبة المسترحبيبة قسمص نسائسل السطسوخسي ٦٦ - تغــــيـــرات فنيســة ٦٧ - مسحساورات الضسوء والظل نقسسد عبد الغنى السيد نقىسىد أشسرف منصيور ٦٨ - النقد المعاصر للفكر السياسي قسيصص محمد صلاح العزب ٦٩ - لونه أزرق بطريقسة مسحسزنة قسيصص أيمن الخسيسراط ٧٠ - أغنية للمسساء الحسرين ٧١ - مــــوكـب الجنون قسيصص صبرى عبد الحفيظ منتصس عسد الموجود ۷۲ - حـــــروب وهــزائــم قسسصص أسسامسة قسرمسان ۷۳ – فنی انتنظار شیء منسسا ٧٤ - هيـــائب عسسلاء الجسسايري ٥٧ - حــــاقــــة شسعسس يحسيني زكسريا جسمسال الجسزيري قسسصص ٧٦ - بدايات قىلىقىسىسىة سيد عبد الله ٧٧ - غـبواية النص وقبراءة اللعب ۷۸ - قـــهاید للبنات شب عبر صبابر متحتميد فبرج ۷۹ - مــــجـــرد شـکـل مجدى عبد المجيد خاطر منهنا شنهناب الدين ٠٨٠ - حــــفــسرة للعب روايسسة أحسمسد عسامسر ٨١ - بورتريه لجسسد مسحستسرق ٨٢ - العبشيق منصبياح الجنسد 

قسسصص هاني عسسد المريد قسسصص صلاح عسساف شسعسر سالم الشسهسباني دراسسة مساهر الضسيع روايسسة متحتمد كتمال حسن شسعسر عسسد الرحسمن آدم شسعسر كسال عبيد الرحيم قسيصص منبي مبحيبي البدين قسسصص منسى مسحميي السدين شسعسر مسحسمبود رضبوان دراسست عماد حسیب محمد روایسسة حسسین منصسور روايسة دعسساء فستسبوح شسعسر هاني مسسلاح العكل شسعسر كسمسال على مسهدى شسعسر عبيد اللطيف مبارك متصطفى الحسسيني شــعــر شسعسر أحسمسد عسيسد قسسصص هیستیم خسیسیری قسسصص عبدالعزيز السماحي شسعسس عسداللطيف أحسد شيعير عبادل ميجيمد أحيمد

٨٢ - شسجسرة جسافسة للصلب ٨٤ - أغنيسة عسن بندقسيسة ٥٨ - ولــــد خـــيــان ٨٦ - العولمة وقضايا الهوية والثقافية ٨٧ - تحسسائيل المسلم ٨٨ - الخـــــــــال ٨٩ - عذراً .. لن أشارك في الاحتفال ٠٠ - يسوم تسكسلسم السطسل ٩١ - الخسسيسسال المسسساف ٩٢ - نيضييسيارة نيظير ٩٣ - الطير في الشعر المصرى المعاصر ٩٥ - فــسركسية كسيعسبب ٩٦ - العسسريات المعبطلة ٩٧ - يسوم يسكسون السراعسي ۸۸ - ئىسىوبىية عىسطىيىش ٩٩ - تحت خط التصييب ١٠٠- باينسى كىسىسىرت ١٠١- رابعـــهم كلبسمهم ١٠٢- أستسرار البستصطامي ١٠٣- للبسحسر كسلام مستسأجل ۱۰۶- تـعــــود أن تمـوت قسسصص أمسسال الشسساذلي ١٠٦ - قبلب أراجسسسسوز شسعسر إبراهيم الرفساعي شمعمر إيهاب البشبيشي ١٠٧ - مسسنسسزل السسروح ١٠٨ - لعلكم تهسستسدون شسعسس محسمود عبد الرازق ١٠٩ - جـــايــز تـرتـاح السسعسيسد المصسري شيسيعبسر شسعسس صسالح أحسسد ١١٠ - الرائي وقسداس الحسجسر قسسس أحسسد حسمدان ١١١ ~ البـــعـــعــــة شــعــر أســمــاءعــواد ١١٢ - صحباح يأتى لك دراسسة إيسناس الهسندي ١١٣ - بيكار معزوفة الكلمة والفرشاه ١١٤ - حسيساة من طرف واحسد شسعسس مسحسد عبيدالحي ١١٥ - ذاكسرة مسشسقسوبة قسسس حسسان دهشان دراسسة أحمد عبد الحميد النجار ١١٦ - المرأة في المخيسال الجسمسعي شسعسر سيدعبدالرحيم ١١٧ - شــتـاء عــجــوز ليستــه يمر

